

Bulitinu Informativu

Kiro di dauâ dzâli, 1-lu sh 2-lu di Maiu 2009, s-dizvârtirâ Curceaua / Arbinishie, lucrârli Andamusiljei Ghenerali a Cunsillui Armânjloru, cari, ashî cumu priveadi sh Statutlu CA, prindi s-aiba locu nai ptsânu unâ oarâ tru-anu.

Andamusea Gheneralâ di estanu – ti a curi aleaptâ andridzeari lipseashti s-hâristusimu a sotsloru di la Uniunea Armânjloru “MANDRA” ditu Arbinishie, cu Prizidentulu Arben Lena, tsi ari sh harea di V-Prizidentu tu Cunsillu Armânjloru, ti tutu copuslu tsi-lu featsira – s-hârsi di unâ partitsipari cama di 90 tu sutâ ditu numirlu a diligatsloru tsi prindi s-hibâ pitricuts di farili membri tu CA la cathi andamusi gheneralâ.

Ditu aghenda di lucru alishtei andamusi, thimisimu raportulu trâ activitatea a Biroului di Cumândâseari a CA tsi fu prizintatu di Prizidentulu CA, activitati tsi s-dizvârti tu atselji ditu soni 6 meshi, muabets andicra di ndauâ adâvgâri/alâxeri tu statutu(articuli adâvgati – câftati di Cunsillu ali Ivropâ, alâxearea numâljei CA, riprizintantsâ CA sh-tu alti stati, etc.), muabets ligati di andridzearea di unâ parei ti sicritariatlu CA – trâ unâ cama lishoarâ culaburari anamisa di sutsatili armâneshtsâ ditu Balcanu sh ti unâ ma bunâ funtsiunari a CA, cumu sh alti cuvendi sh-pripuniri ligati di andridzerli ti unu Cungresu Internatsiunalu, arâdâpsiti di Grâmâticlu Gheneralu CA, Niculaki Caracota.

Tutu la aestâ andamusi furâ sh muabets ligati di structura organidzatoricâ a cunsillui, s-andreapsirâ parei di lucru pi diversi dumeni, parei cari s-andrupascâ activitatea di lucru a Biroului di Cumândâseari a CA.

Tu soni, Prezidentulu CA deadi tu shteari planlu di lucru a Biroului Executivu , trâ yinatorlu naima aprukeatu, planu ditu cari thimisimu lucurlu naima di simasii tsi Cunsillu Armânjloru sh-pripusi s-lu-ahurheascâ, nica estanu, dialoguri dishcljisi cu cathi kivernisi ditu Balcanu iu bâneadzâ Armânjilji, s-ahurheascâ s-bagâ tu practikie sinfiradzli ti cari s-thimiljusi aestu cunsilu.

Tu aesti dauâ dzâli di lucru, diligatslji CA tsi loarâ parti la aestâ Andamusi Ghegeneralâ, s-hârsirâ sh-di unâ musheatâ searâ culturalâ armâneascâ, cu jocu, cânticu sh puizii, andreaptâ di Uniunea Armânjloru MANDRA.

Cunsillu Armânjloru,
Biroulu di Cumândâseari

tu 14-li di Maiu 2009

(Bulitinu Infurmativu Nr.10)